

FAJUUMENUMI SIDRUWAAS SATI ANAU

WANDOMI :

Yíneni aat mati faɲaaf fati anau di sidruwaas soola, san umaje sirere di saasu ban poop sisofut di uceen soo silakom fujuumaf fati di malegenam, di kairaay di dúniaay búrom ;

Yíneni jaat anau nasonsoɲ mati kàmanjaataak di eñoosey sidruwaas sati anau soo siɲarulomi màkojiam, ban malegen munkul mujawulojaw di dúniaay man Anoosan muɲooleɲoolen usanken man súmimi nusof man súmimi, nupak di màkooleniam di bugaalab ;

Yíneni jaat mati sensen man aakemmi mofam apooy sidruwaas sati anau, takumɲarul anau tuuñool eri manakaan wajakut ;

Yíneni jaat mati kàliɲen bapaalaay bati sísukas jajak;

Yíneni jaat di kabaatak kati dúniaay búrom, bukanak kulanlaañ kúyiisen mankusofumi sidruwaas sati anau di faɲaaf fati anau di malegenaam mati anan di kare'enak búrom aniine di aseek ban poop kujunjuum burok man mati anau mujaw fáculey;

Yíneni jaat mati sísukas sàndomi soo di "Organisation des Nations Unies" sijunjuum ejuum yati sidruwaas sati anau di dúniaay búrom sikaani.

Yíneni jaat mati sidruwaas sati anau kankaan waaf wáamak wáriiɲe ejuum man wasankeníña a ukaani.

Asambule Seneraal

Esosof mati furimaf ufe fujuumenumi sidruwaas sati anau kankaamn waaf wajake máamak bee bukanak búrom di sísukas búrom. Moo kaane jajak man bukanak di sikafaas kujuum mankuɲenúfo di kúyiisenufo kuñiilak ñatimkaraɲ mukaanaam moomu búrom eñesey maapi kaanimi man dúniaay búrom éyinen di ekaan siluwaas soosu nen mansiregumi eeno.

Fujuum 1

Bukanak búrom nan kuwolimi kurere kererer di waafaw búrom. Kubabaj poop býejet di karampenoor.

Fujuum 2

Anoosan nababaj sidruwaas soosu búrom; bajut aseek bajut ániine, bajut an ati kansanken kúbúto, bajut an ati kapongol kúbuto, bajut paarti ébuto, bajut an abaji di muceen benen bajut ró kápajul kuceen kati pólitik kati luwa mba kati ésuk, yabaje faɲaaf fooliyo mba ebajut.

Fujuum 3

Anoosan nababaj druwa ebaj fuyiifaf foola, ebaj kapooy kati faɲaaf fool a di kaano nen man amaɲumi eeno.

Fujuum 4

An letalako amiikeel ati akeen, letarok bee akeen; ban poop miikeliyaay di kanoomen kati kumiikeel firenifiren.

Fujuum 5

Bajut katoorandiɲ an; an létassuutukeni.

Fujuum 6

Anoosan oomu di druwaay yoola banooban ban ammi.

Fujuum 7

Luwaay ere'en re'en bukanak búrom anoosan nababaj kapooyak kákonak kati luwaay. Anoosan nababaj kapooy mba mukaanaay máluse furimaf ufe.

Fujuum 8

Anoosan nuɲooleɲoolen ulamandi furim mba mukaanaay máluse sidruwaas soosuña san umanjumi luwaay eseneso.

Fujuum 9

An letuɲoolen ulaaf an manusofool, nukulool mba nukesoool.

Fujuum 10

Anoosan nubabaj druwa káyiiisen di bantabaay wabajimi tiribinaal yan umanje elaañut di anoosani yooyu eje'em bee efeley.

Fujuum 11

Luwaay yoone an anoosan kurege oo akaane mátaaɲiye kulaafoolaaf bee funakaf fati kíitiyey yiiseni jaat wakaanumi mankoone akila akaane oo babajerab kujuumak koola.

An leekukulool mati waaf wan umanje nan ukaanumi ulakout wátaaɲiye di luwaay di poop an letakaanool saariyoɲ yawuuje yawarin ekaani.

Fujuum 12

An uwarut unoken di mukaanaam mati an, síndaay yati an, mba tan tati an mba nuyenten faɲaaf foola mba nukajen kajamaak koola. Luwaay epoopooy anau di waafaw búrom.

Fujuum 13

An anoosan nababaj druwa ejaw ban súumoomi di ekin ban súumoomi di ésukey yoola.

Anoosan nababaj druwa épur mof haani moola di elaañul nan súumool.

Fujuum 14

Nan táaɲimi anoosan nuɲoolene ujaw úgongoto do mof múbuto.

Letuɲoolen ubaj kágongoto kukila lako jaat nububuj an.

Fujuum 15

Anoosan nubabaj druwa ebaj mof miiya.

An letaɲoolen áfiren an méé ebaj mof moola mba épur di moo.

Fujuum 16

Akambaani di ajaja káriiɲe býebo Kuɲooleɲoolen kuyabooy mankubaj kuñiil bápajuloorut sisiw mba sísuk mba buɲarab. Kurere di kayabooyak di býeabaab di ebaney yoolibo.

Býeabaab mambukaan, kuyabooraak kujamoor.

Bukanak kakinum di kaakemmi mofam kuwawar kupooy fiilaf falakomi fufaaraf fati kalakaak.

Fujuum 17

Anoosan, nababaj druwa ebaj waaf woola fúko'ol mba wan kunampoore di kupaalool.

An letuᵑoolen ubot fubaj fati ata fo di mée.

Fujuum 18

Anoosan wuniwun, manubaj kawonoor kiiya, ejuk yiiya di buᵑar biiya, súumi jaat nuᵑoolene úruuᵑ mba núje'etum buᵑarab biiya tíyaᵑaraay nen man bucceᵑum eeno.

Fujuum 19

Anoosan nababaj druwa, ebaj kawonoor kiiya di káyiiisen ko nen manumaᵑumi eeno. Yoo elakomi an awarut ajaakali ebaj siwonoor soola. Naᵑoolenᵑoolen ayab kurim mba siwonoor san aᵑoolene afasiken dóo ésukool mba tíyaᵑ.

Fujuum 20

Druwaas ewuwun anoosani manajuumen kámit mba káfa yati kásuumaay.

An letuᵑoolen unoken an di káfa yanamaᵑut.

Fujuum 21

Anoosan nuᵑoolenᵑoolen ulako di fujuum fati mukaanaam mati mofam miya mba nubaj kan úfojule kaje'e beet ejuumi.

Anoosan nuᵑoolenᵑoolen ubaj fujuum di mukaanaam mati mofam miya.

Kamaᵑak kati bukanak koo kukiimi sembaay yati kaakemmi mofam. Kamaᵑak kukila woteey éyiisenemi ko. Moo kaane woteey ekila ewawar ebaj waati di waati.

Fujuum 22

Anoosan tan ukinumi sensen manubajuto kayeraay yoola. Kayeraay yooyuña éjowumulojowum di sidruwaas sati fubajaf di sati tan akinumi di sati mukaanaam moola. Kayeraay yooyu an aᵑoolent ábajaatiyo; moo kaane ésukoo ésuk enampoonampoor di sísuk saasu man kayeraay yooyu ekila ebajo.

Fujuum 23

Anoosan nababaj druwa ebaj burok básuumoo.

Bajut aseek bajut ániine anoosan aroke burok nababaj druwa mankucaamool bacaam bare'e nan burokab banakaanumi.

Anoosan ammi di burok kuwawar kucaamool yaj manᵑoolen acookoor síndaay yoola, naᵑoolen abaj kayere di faᵑaaf foola.

Anoosan nababaj druwa kajuumen fujum fati kurokaak, naᵑoolenᵑoolen en poop ánokendo mankumak aajaay.

Fujuum 24

Anoosan nababaj druwa ebaj kunak kati kayoolo, kati fúraar. Waatay yati burokab ewawar erewoor ban di ebaj waati yati kayoolo ban pankucaam bukanak.

Fujuum 25

Anoosan nababaj druwa wákoyume bee akila, bukanak koola, furiaf wañaw di tan akinumi wawar jak. An másuumaati mubaje nen kásumut nen an ataool ájime mba an eluupool efumoe. Bukanak kuwawar kurampenool.

Mudeenanaam di kuñiilak kuwawar kubaj kákaanum di karampen káamak. Kuñiilak búrom "Kabaji di kayaboore mba kayaboort" kure'e. Koo búrom kuwawar kubaj kacookoor kajake.

Fujuum 26

Anoosan nababaj druwa kakaraᵑ an awarut acaam kakaraᵑ. Añiil nawawar akaraᵑ bacaamut waafowaaf kakaraᵑ kati siteginikas di kati burok kuwawar kúkambuli di bukanak búrom. Silekoolas sáamakas poop bajut káfajul.

Nafaay yati kakaraᵑak yoo eenom majakaam mati anau di faᵑaaf foola. Kakaraᵑ kujunjuum fujuum fati epooy sidruwaas sati anau; yoo yákoney ebenenbenen bapaalaab di mof majuupoe di tutooraay yati mof majuupoe di sisiw sajuupoe di bukan kanaamut di uᵑar di wanoosan wakaanimi man kayeraay elako di dúniaay.

Kubajaak kati kuñiilak koo koote kanoken kuñooliil di kakaraᵑ kan koo kumaᵑumi.

Fujuum 27

Anoosan nababaj druwa ekaan mukaanaam mati bukanool, nañes mammujaw fâcul mammunafaool.

Anoosan ajoonene waaf mba naciik waaf, luwaay ewawar eppooyuwo.

Fujuum 28

Anoosan nababaj druwa man majoone mulako di mofool di dúniaay maje'e bee ekaan man siluwaas sammi di kaytak uke siᵑoolen sirok jak.

Fujuum 29

Anoosan nawawar anafa kan kukinoorumi, bukoo keb kuᵑoolene kurampenool man moola mujaw fâcul.

Man kakinoorak kúsum, babaj luwa yajuumeni mati mati manemat sidruwaas soola di mukaanaam mati bukanak an anoosani sidruwaas soola di majakaam moola murelore tan maamu mati aamu mutooᵑumi.

Sidruwaas di siluwaas san ujukulaaña siwarut sípur di wan sísukas sati “Nations Unies” sisofumi.

Fujuum 30

Waaf úleero di kayitak uke wan umanje an mba bukan mba mof muᵑoolenᵑoolen mújowum to mammukajen sidruwaas di siluwaas sándomi kayitak asambule seneraal yati óni éyinenyinenuko eban di épurenuko di burokab booliyo n° 217 (III) bati fuleeᵑafu fati desambuur nan fubajumi kunak uñen di emitey 1948.